

Miercus 14
S. Eliseu

Sabide 17
S. Rainir di Pise

Martars 20
S. Etor

Il proverbi
Al fâs il mâl
tant cui che al ten
che cui che al scortee



Il soreli
Ai 14 al jeve aes 5.13
e al va a mont aes 21.01

Joibe 15
S. Vît

Domenie 18
Corpus Domini

Il timp
Cil seren, scjafoiaç

Lis voris dal mès
Gjavait lis menadis dai pomodoros
se indi è masse




La lune
Ai 17 ultin cuart

Vinars 16
S. Aurelian v.

Lunis 19
S. Romualt

la GNOVE

DOMANDIS DENTRI DAI 26 DI JUGN Servizi civil in Filologjiche



Ai 26 di Jugn, aes 2 daspomisdi, al scjât il tiermin par candidâsi a fâ il servizi civil te Societât filologjiche furlane (te foto). Al è puest par 2 volontaris dentri dal progjet «ProLenghe: promozion de lenghe e de culture furlane».

Partecipant al progjet il volontari al impararà elements di organizazion di events, comunicazion, segretarie di redazion di publicacions e rivists; al cognosarà il sisteme dai mieçs di comunicazion regionâl, lis comunitâts lingüistichis, la lenghe furlane scrite e orâl. Il servizi, che al sarà di fâ te sede de Filologjiche in vie Manin 18 a Udin, al durarà 12 mès. I volontaris a àn dirit a un assegn di 433,80 euros ogni mès. A puedin partecipâ ae selezion i citadins europeans, cence distinzion di gjenar che, ae date di presentazion de domande, a vedin 18 agns finîts e no plui di 28. Si domande ancje il diplome di scuele medie superiôr, la cognossince di une o plui lenghis europeans, la cognossince de informatiche di base, buinis capacitâts di comunicazion. La domande, insieme cu la fotocopia di un document di identitât e di une schede dulà declarâ i titui culturâi, si à di spedile o presentâle ae Filologjiche furlane, vie Manin 18 – 33100 Udin. Lis domandis a puedin rivâ a man, cun racomandade A/R o par pueste electroniche certificade ae direzion sff@pec.filologicafriulana.it Par vè plui informazions e par discjamâ lis cjartis par fâ domande, si puedin viodi i sits www.filologicafriulana.it – www.infoserviziocivile.it

Ae Cjamare saltât l'acuardi su la gnove leç eletoâl. L'emendament Biancofiore-Fraccaro sul troi dal dispreseament des diversitâts

Vôt cuintri lis autonomiis

CHEL DAI 8 DI JUGN ae Cjamare dai deputâts al è stât un vôt cuintri lis democraziis dai teritoris (te foto sot). Nuie di plui clâr. Dilunc dal dibatit su la gnove leç eletoâl, l'emendament di Michaela Biancofiore, deputade di Fuarce Italie elete in Trentin/Sudtiròl, fat bon de Cjamare, al elimine i coleçs maioritariis che la leç eletoâl e mantignive in Trentin/Sudtiròl, introduzint te Regjon a statût speciâl il ripart proporzionâl dai coleçs, tant che al sucèt tal rest de Italie. Un pataf al Partît democratic, che al veve



garantît il mantigniment dal Mattarellum te Regjon – no cate lis modificis vignudis indevant –, che al sigurave, te provincie di Bolzan, ae Südtiroler Volkspartei (Svp) ducj i seçs (vot maioritariis – ven a stâi che il candidât plui votât al cjape il seç –, plui trè proporzionâi), jessint il partît di minorance di lenghe todesce il plui fuart di ducj.


Cu la aprovazion dal emendament Biancofiore (e prime di jê al veve presentât un emendament compagn Riccardo Fraccaro, dal 5 Stelis, tant che a son stâts votâts insieme) si sargie al Trentin/Sudtiròl il ripart proporzionâl dai coleçs, e, duncje, la Svp – che e sostignive la gnove leç eletoâl in grazie di un acuardi cul Pd – indi pierdarès diviers. Saltât il pat su la leç eletoâl e in spiete di viodi quale che e sarà la linie che e vignarà indevant, di sigûr chel dai 8 di Jugn al è stât «un vôt cuintri lis specialitâts regionâls, cuintri chei che si ritegnin i privileçs des minorancis», al dîs **Giorgio Cavallo**, ex conseîrs regionâl e assessôr dal Comun di Udin: «Une deformazion mentâl costruide de informazion, fate proprie di un vèr populisim di regjim e che al segnale che il Stât si sta sfantant te sò capacitât di interpretâ la democrazie tant che un telâr complet di dirits che a àn di valè massime pes minorancis».

Chel che al sta sucedint al è la risulde di «une idee neocentralistiche di un Stât li che lis autonomiis regionâls in particolâr, a dan fastid», al dîs **Diego Navarra**, president de Assemblee de Comunitât lingüistiche furlane che e met dongje 102 Comuns dal Friül-Vignesie Julie, che propit sul teme al jere intervignût ae vilie dal vôt denunciand il fat che la gnove leç eletoâl no veve dât acet ae richieste de Assemblee de Comunitât di ga-

rantî une rapresentance politiche ae minorance lingüistiche furlane, tant che, invezit, al sucèt in Trentin/Sudtiròl e Val di Aoste. «Al risulde che in Comission Affârs costituzionâi dôs vôs bipartisan, chês dai onorevui Gianna Malisani (Pd) e Gian Luigi Gigli (Democrazie solidâl – Centri democratic), a vedin provât a puartâ la cuestion sot forme di emendaments metûts in discussion, ma si son cjatâts devant un mûr», al spiegher Navarra. Lu conferme la deputade di Sinistre taliane, **Serena Pellegrino**, che e à sottoscrit l'emendament de Malisani, ma, e marche, propit «il partît di maiorance, chel de deputade proponinte, al à dât parè contrari e no lu à sostignût».

«I furlans ur disin grazie a Malisani e Gigli – al siare Navarra –, ma no dismentein che lis stessis fuarcis politichis che a Triest, in Consei regionâl, si jerin impegnadis formalmentri, a Rome no ricognossin par nuie la esigence di garanzis costituzionâls pes minorancis». La rispueste a cheste situazion e pues jessi dome politiche: «O speri intune incressite di cussience dai furlans devant dal dispreseament des diversitâts e che e vegni fûr cualchi fuarce politiche, che e ponti al autoguvier de nestre tiere, buine di puartâ a Rome cualchi rapresentant, che al sedi, come pal Sudtiròl, determinant pe stabilitât dal Guvier».

ERIKA ADAMI



«50 Corâi de cristianitât todesce voltâts par furlan» ai 140 còrs de provincie di Udin

I 140 grups corâi de provincie di Udin a cjapanan ta chescj dis il volum «50 Corâi de cristianitât todesce voltâts par furlan» di pre 'Sef Cjargnel, pre Romano Michelotti e dal professor Gabriele Zanello. La publicazion, dade fûr di Glesie Furlane cul contribût de Provincie di Udin, e propon 50 spartîts, dant ai fedèi un imprest valit pe preiere; tant che al dîs te sò prefazion ae opare pre Loris Della Pietra, retôr dal seminari interdiocesan di Udin, Gurize e Triest, cul cjant corâl la azion liturgjiche e assum une dimension plui nobile e profonde. Pandint la publicazion di Glesie Furlane si invidin i còrs a cjapâ sù lis propuestis par insiorâ il lôr repertori in lenghe. Par vè informazions sul test, si pues scrivi une mail ae direzion: info@glesiefurlane.org

Storie de art furlane in lenghe/114.....

Bambini e Dorigny dal Patriarcje

UN DAI PRINS ARTISCI venezian clamâts in Friûl tai prins dal Sietcent al è Nicolò Bambini (1651-1736) che il Patriarcje Dionisio Delfino i fâs fâ la decorazion de biblioteche patriarcjâl eseguide viers il 1710. Il pitôr al met une grande tele tal sufit dulà che al piture «Il trionf de sapience sacre», cuatri sore puartis, cul trionf de fede, chel de cussience de glesie e il trionf de veretât e parimentri i 4 evangjels. Pe capele interne dal palaç al met su la tele dal sufit la Assunte cui sants Ermacure e Fortunât. In chescj ciclis di oparis al torne fûr il temperament conservadôr dal artist, che al propagande la largjece de aree venite cuntun gust academic di estrazion romane, par di plui sul stîl dal Maratta. Cundut a chel, no podin sotvalutâ lis gustosis viertiduris «claristis» e la gnervosetât dal segn.

Tai prins dal Sietcent, al lavore in Friûl ancje il parigjin Ludovî Dorigny (1654-1742), par altri ancje lui cjapât dal inceant baroc, ancje se interpretât cuntune cierte crudece francese. Viers dal 1708 al varès di vè ornât une des salis a soreli jevât de

vile Manin di Passarian, coloborant cul architè Meni Rossi.

Ma la prime opare sigure al è l'afresc de cupulute de scjale a cai tal palaç arcivescovil di Udin, progjetade di Rossi: al rapresente il Divin Legjislatôr te glorie dai agnui e e je firmade e datade 1709. I colòrs a son opacs, leâts al ambient parigjin, la modelazion e la lûs ferbinte a sintin, invezit, dal mût di Solimena.

Ator dal 1720 Dorigny al eseguis i afrescs tal domo di Udin (te foto) dulà che al lasse ancje dôs grandis telis. Ancjemò une volte al colobore cul grup di Rossi, che i afide il comit di decorâ il presbiteri e il coro. Tal volt a çampe, suntun disen a cape fat su misure, lui al à figurât Adam e Eve, Noè e Abèl, il sacrifici di Isac, Mosè, David, Aronne e Danèl e Sant Zuan Batiste e Sant Josef, intant che tai medaions cui penacui si puedin viodi i profetis Gjeremie, Isaie e Ezechièl, te volte a man drete a son rapresentâts Sant Michèl, Sante Cecilie e Sant Jacum, Sante Apolonie, Sante Catarine e agnui; Sante Marie Madalene, Sant Zuan Evangjelist e Sant Mateu, Sant Dree e Sant Francesc, Sant Lau-



rinç i doi martars. A chescj a fasin di suaze e in altris ovai, dotòrs de glesie, Sant Justin, Sant Gregori e Sant Brôs. Tal mieç dal presbiteri l'architè al à creat un volt a forme ovâl che si strenç tal centri dulà che al salte fûr un voli grandonon, dulà che e risalte la figure dal Pari Eterni. Chescj afrescs, formâts di grups di agnui su nûi pençs, fiscâts dai event belics de ultime vuere, a son stât sostituits di decorazions sul stes teme, fatis dal pitôr furlan Fred Pittino tal 1965. A Dorigny i spiete ancje la decorazion dal coro.

BEPI AGOSTINIS

DAL 1987 NASCENTE LAVORA AL VOSTRO FIANCO

PITTURE



SISTEMAZIONE
SERRAMENTI



MANUTENZIONI
EDILI



Nascente è il valido aiuto per risolvere i piccoli lavori di manutenzione utili a: privati, aziende, condomini, enti e comunità.



NASCENTE
Società Cooperativa Sociale a r.l.

Nascente
Società Cooperativa Sociale a r.l.
via Chrisimato, 40 - 33100 Udine
fax 0432 405759

Contatti: 0432 541966
www.nascentecooperativa.it